



Број/Број: 03-/4-50-1-10-25-15/9
Сарајево/Сарајево: 16. 06. 2009. године

Z A P I S N I K

25. sjednice Zajedničke komisije za evropske integracije Parlamentarne skupštine BiH

Sjednica je održana 16. 06. 2009. godine sa početkom u 11:00 sati.

Sjednici su prisustvovali članovi Komisije: Halid Genjac, predsjedavajući, Ivo Miro Jović, prvi zamjenik predsjedavajućeg, Drago Ljubičić, drugi zamjenik predsjedavajućeg, Rudo Vidović, Alma Čolo, Šemsudin Mehmedović, Zoran Koprivica, i Selim Bešliagić.

Branko Dokić, Milica Marković, Hilmo Neimarlija i Azra Hadžiahmetović nisu prisustvovali sjednici, opravdali su odsustvo.

Sjednici su prisustvovali i članovi Komisije za ekonomske reforme i razvoj: Bajazit Jašarević i Mehmed Suljkanović.

U ime predstavnika Vijeća ministara sjednici je prisustvovala Zara Halilović iz Direkcijae za evropske integracije i Dragan Mektić, član Interresorne radne grupe za liberalizaciju viznog rezima EU za građane BiH. Sjednici su prisustvovali i predstavnici OSCE - Misija u BiH, ACIPS-a, centra za interdisciplinane postdiplomske studije, kao i predstavnici medija.

Prisustvovala su Vlatka Dangubić, sekretar Komisije i Vladana Lučić, stručni saradnik u Komisiji.

Komisija je jednoglasno usvojila sljedeći

DNEVNI RED

1. Usvajanje Zapisnika 24. sjednice Komisije;
2. Davanje mišljenja o Informaciji o korištenju pretpristupnih fondova (Informacija dostavljena od Direkcije za evropske integracije);
3. Preostale obaveze iz Mape puta za liberalizaciju viznog režima;
4. Tekuća pitanja;

Ad. 1. Usvajanje Zapisnika 24. sjednice Komisije

Zapisnik 24. sjednice Komisije usvojen je jednoglasno.

Ad. 2. Davanje mišljenja o Informaciji o korištenju pretpristupnih fondova (Informacija dostavljena od Direkcije za evropske integracije);

Nakon uvodnog izlaganja Halida Genjaca i provedene je rasprave u kojoj su učestvovali svi prisutni članovi Komisije, usvojeno je sljedeće:

MIŠLJENJE

o „Informaciji o načinu korištenja pretpristupnih fondova“ i o „Informaciji o aktuelnoj situaciji u realizaciji projekata iz fondova IPA programa“

Na zahtjev Doma naroda, Direkcija za evropske integracije je 22.04.2009. godine Domu naroda dostavila „Informaciju o načinu korištenja pretpristupnih fondova“.

Na zahtjev Zajedničke komisije za evropske integracije, predsjedavajući Vijeća ministara je 23.04. 2009. godine dostavio „Informaciju o aktuelnoj situaciji u realizaciji projekata iz fondova IPA programa“.

Kolegij Doma naroda je dopisom od 20.05.2009. godine proslijedio „Informaciju o načinu korištenja pretpristupnih fondova“ Zajedničkoj komisiji za evropske integracije radi razmatranja i očitovanja.

Iako se dopisom Kolegija Doma naroda traži razmatranje i očitovanje o „Informaciji o načinu korištenja pretpristupnih fondova“, Zajednička komisija za evropske integracije je, zbog suštinske povezanosti ove dvije informacije i činjenice da samo zajedno daju cjelovit prikaz aktuelnog stanja implementacije IPA programa za Bosnu i Hercegovinu, razmatrala obje navedene informacije.

Komisija je nakon rasprave ustanovila:

I „Informacija o korištenju pretpristupnih fondova“ daje opšti prikaz IPA instrumenata i procedura odobravanja projekata;

II „Informacija o aktuelnoj situaciji u realizaciji projekata iz fondova IPA programa“ detaljno i objektivno prikazuje trenutno stanje projekata po komponentama:

a) Komponenta I IPA-e (institucionalna izgradnja i tranziciona podrška)

Nacionalni paket za 2007. godinu sadrži 46 odobrenih idejnih projekata. Finansijski sporazum je potpisan i ratifikovan, odabir izvođača je u toku i očekuje se da će prvi projekti IPA I za 2007. godinu otpočeti sa implementacijom u drugoj polovini 2009. godine;

Nacionalni paket za 2008. godinu sadrži 26 idejnih projekata, usvojenih u dva dijela. Finansijski sporazum je potpisan za prvi dio (5 projekata). Finansijski sporazum za drugi dio projekata još nije potpisan. Za ukupno 8 projekata je u toku odabir ponuđača. Stvarna implementacija projekata za 2008. godinu može se očekivati početkom naredne godine;

Nacionalni paket za 2009. godinu - proces programiranja je proveden. Evropska komisija je preporučila da se polovina sredstava za ovu godinu u iznosu od oko 40 miliona eura namijeni za finansiranje infrastrukturnih projekata sa ciljem održavanja i razvoja BiH privrede. Tako prvi put IPA I za 2009. godinu ima dva dijela, prvi infrastrukturni i drugi uobičajeni (tehnička podrška institucijama BiH). Prvi dio će Upravni odbor IPA-e usvajati u julu, a drugi dio u septembru ove godine. Praktična i stvarna implementacija ovih projekata se može očekivati najranije sredinom 2010. godine.

b) Komponenta II IPA-e (prekogranična saradnja)

Pozivi za podnošenje projektnih prijedloga za bilateralne programe za 2007. 2008. i 2009. godinu su u finalnoj fazi pripreme.

Pozivi za podnošenje projekata za Jadranski program, Program za prostor Jugoistočne Evrope i Mediteranski program su, uglavnom, u pripremi.

Dakle, sredstva iz Komponente II IPA-e još uvijek nisu u fazi ugovaranja.

III Evidentno je kašnjenje implementacije projekata IPA komponente I za 2007. godinu, uzrokovano odgađanjem potpisivanja finansijskog sporazuma zbog neblagovremenog imenovanja državnog IPA koordinatora (DIPAK);

IV Komisija preporučuje Vijeću ministara i Direkciji za evropske integracije da se založe za što veće učešće domaćih izvođača u implementaciji odobrenih projekata;

V Komisija pozdravlja napore koje čini Vijeće ministara i Direkcija za evropske integracije na uvođenju decentralizovanog sistema implementacije pomoći EU, što je uslov za pristup ostalim IPA komponentama (III- Regionalni razvoj, IV-Razvoj ljudskih kapaciteta i V- Ruralni razvoj);

VI Komisija sugeriše Kolegijima Domova da osiguraju dostavljanje obje navedne informacije sa pratećim tabelama odobrenih projekata svim poslanicima i delegatima Parlamentarne skupštine Bosne i Hercegovine.

Za izvjestioca na sjednici Predstavničkog doma imenovan je Halid Genjac.

Za izvjestioca na sjednici Doma naroda imenovan je Ivo Miro Jović.

1. Ad. 3. Preostale obaveze iz Mape puta za liberalizaciju viznog režima

Sjednici je, u ime Interresorne radne grupe za liberalizaciju viznog režima EU za građane BiH, prisustvovao g. Dragan Mektić, koji je prezentirao aktuelnu situaciju u pogledu obaveza iz Mape puta. Interresornoj radnoj grupi za liberalizaciju viznog režima EU za građane BiH, 12.06.2009.g. u Briselu je predstavljena ažurirana ocjena Evropske komisije o napretku BiH u ispunjavanju obaveza iz Mape puta, i po riječima g. Mektića, ocjena je bila da je BiH učinila dosta, ali ne i dovoljno, da bi se moglo razgovarati o definitivnoj liberalizaciji viznog režima. Do kraja jula, Evropska komisija će uputiti pismo kojim će tražiti da se izvrši „inventura“ obaveza koje smo izvršili i da se napravi akcioni plan za ostale obaveze na ispunjavanju preostalih uslova. Očekuje se da BiH do 01.10.2009.g. ažuriran izvještaj o spremnosti BiH da implementira svoje obaveze iz Mape puta.

Kao oblast koja zahtijeva brzo reagovanje, g. Dragan Mektić je posebno istakao borbu protiv korupcije i organizovanog kriminala, gdje je potrebno izraditi novu strategiju.

Nakon rasprave, u kojoj su učestvovali svi prisutni članovi Komisije, jednoglasno su doneseni sljedeći zaključci:

I Komisija je prihvatila izvještaj koji je podnio Dragan Mektić, član Interresorne radne grupe za liberalizaciju viznog režima EU za građane BiH;

II Izražavajući nezadovoljstvo zbog kašnjenja u ispunjavanju obaveza iz Mape puta za liberalizaciju viznog režima, Zajednička komisija za evropske integracije predlaže domovima PSBiH da Vijeću ministara Bosne i Hercegovine preporuči da u što kraćem roku, usvoji akcioni plan realizacije preostalih obaveza iz Mape puta za liberalizaciju viznog režima EU za građane BiH.

Ad. 5. Tekuća pitanja

Članovi Komisije informisani su o predavanju o Zakonu o državnoj pomoći koje će se održati 23. i 24. juna u Banja Luci. Svi članovi Komisije pozvani su da prisustvuju.

Sjednica je završena u 13,00 sati.

Predsjedavajući
Zajedničke komisije
Halid Genjac

